

Aalisarnermut immikkoortitat pillugit Inatsisartut inatsisaata allangortinnissaanut Naalakkersuisut peqquneqarnissaannik Inatsisartut aalajangiiffigisassaattut siunnersuut, taamaalilluni isaterinissamut tapiissutinik akiliuteqarnermi aalisarsinnaanermut akuersissutit siunissami atorunaarsinnissaat periarfissaajunnaassalluni.

(Inatsisartunut ilaasortaq Hans Enoksen, Partii Naleraq)

Akissuteqaat

(Aalisarnermut, Piniarnermut Nunalerinermullu Naalakkersuisoq)

1. Siullermeerneqarnera

Inatsisartunut ilaasortaq Hans Enoksen siunnersuummik saqqummiussaqaarmat Naalakkersuisut sinnerlugit qujassuteqarniarpunga.

Naalakkersuisut suleqatigiinnissamik isumaqatigiissummi nalunaarutigaaat kalaallit aalisariutaannik isaterinissami tapiissuteqartoqarnerani piunasaqaatinut atuuttunut sakkukillisaasoqarnissaa kissaatigigitsik. Tamanna tunngavigalugu 2015-imi ukiakkut ataatsimiinnissami Aalisarnermut immikkoortitat pillugit Inatsisartut Inatsisaata allangortinnissaanut allannguutissatut siunnersuummik Naalakkersuisut saqqummiiniarlutik pilersaaruteqarput. Naalakkersuisulli siunnersuummik kissaatigineqartumik kingusinnerusukkat saqqummiiniarlutik aalajangereernikumata Naalakkersuisut aalajangiiffigisassatut siunnersuummut isumaqataanertik nalunaarutigisinnaavaat.

Siunnersuut 2014-imi ukiakkut ataatsimiinnermi saqqummiunneqaraluartoq siunnersuummi aallaavigineqarpoq.

Taamaattoq siunnersuummut tunngatillugu Naalakkersuisut ilassuteqarsimapput. Allannguutit tamakku tunngavigalugit siunnersuut tusarniaatigalugu nassiunneqarsimavoq. Tusarniaaneq pissutigalugu siunnersuut 2015-imi upernaakkut ataatsimiinnermi suliarissallugu angumerineqarsinnaasimangilaq. Siunnersuummi nassiunneqartumi siunertarineqarpoq malittarisassat imaalillugit allangortinneqassat akuersissutit tigummiinnarnissaannut periarfissiisoqassasoq.

Tusarniaanermut akissutit tiguneqartut suliarereernerisigut siunnersuutip 2015-imi ukiakkut ataatsimiinnermi suliarineqarnissaa naatsorsuutigineqarpoq.

Oqaatsit taakku atorlugit siunnersuut matumuuna Inatsisartunut oqaluuserisassanngorlugu ingerlateqqippara.